



五

卅五

萬首唐人絕句卷第五

五言一百首

江行無題一

錢起 一百首

傾酒向漣漪乘流東去時寸心同尺璧投此報馮夷

二

江曲全縈楚雲氛半自秦峴山回首望如別故關人

三

浦煙函夜色冷日轉秋旻自有沉碑石清光不照人

四

楚岸雲空合楚城人不來只今誰善舞莫恨發陽臺

五

行背青山郭吟當白露秋風流無屈宋空詠古荊州

六

晚來漁父喜曾重欲收遲恐有長江使金錢願贖龜

七

去指龍沙路徒懸象魏心夜涼無遠夢不爲偶聞砧

八

霽雲疎有葉雨浪細無花穩放扁舟去江天自有涯

九

好日當秋半層波動旅腸已行千里外誰與共秋光

十

潤色非東里官曹更建章宦游難自定來喚櫂船郎

十一

夜江清未曉徒惜月光沉不是因行樂堪傷老大心

十二

翳日多喬木維舟取束薪靜聽江叟語俱是厭兵人

十三

箭漏日初短汀煙草木衰雨餘雖更綠不是采蘋時

十四

山雨夜來漲喜魚跳滿江岸沙平欲盡垂蓼入船牕

十五

渚邊新鴈下舟上獨淒涼俱是南來客憐君綴一行

十六

牽路緣江狹沙崩岸不平盡知行處險誰肯載時輕

十七

雲密連江暗風斜著物鳴一杯真戰將笑爾作愁兵

十八

柳拂斜開路籬邊數戶村可能還有意不掩向江門

十九

不識桓公渴徒吟子美詩江清唯獨看心外更誰知

二十

憔悴異靈均非讒作逐臣如逢漁父問未是獨醒人

二十一

水涵秋色靜雲帶夕陽高詩癖非吾病何妨吮短毫

二十二

登舟非古岸還似阻西陵箕伯無多少回頭詎不能

二十三

帆翅初張處雲鵬怒翼同莫愁千里路自有到來風

二十四

悠雲久無雨江燕社猶飛却笑舟中客今年未得歸

二十五

佳節雖逢菊，浮生正是萍。故山何處望，荒岸小長亭。

二十六

行到楚江岸，蒼茫人正迷。祇如秦塞遠，格摘鷓鴣啼。

二十七

月下江流靜，村荒人語稀。鷺鷥雖有伴，乃共影雙飛。

二十八

斗轉月未落，舟行夜已深。有村知不遠，風便數聲砧。

二十九

棹驚沙鳥迅，飛濺夕陽波。不顧魚多處，應防一目羅。

三十

漸覺江天遠，難逢故國書。可能無往事，空食鼎中魚。

三十一

岸草連荒色，村聲樂稔年。晚晴初穫稻，閑却采蓮船。

三十二

灘淺爭游鷺，江清易見魚。怪來吟未足，秋物欠紅蕖。

三十三

蛩響依莎草，螢飛透水煙。夜涼誰詠史，空泊運租船。

三十四

睡穩葉舟輕，風微浪不驚。任君蘆葦岸，終夜動秋聲。

唐詩卷五
四
三十五

自念平生意曾期一郡符豈知因謫宦斑鬢入江湖
三十六

煙渚復煙渚畫屏休畫屏引愁天末去數點暮山青
三十七

水天涼夜月不是惜清光好物隨人秘秦淮憶建康
三十八

古來多思客搖落恨江潭今日秋風至蕭疎獨沔南
三十九

映竹疑村好穿蘆覺渚幽漸安無曠土薑芋當農收

四十

秋風動客心寂寂不成吟飛上危檣立啼鶯報好音
四十一

見底高秋水開懷萬里天旅吟還有伴沙柳數枝蟬
四十二

九日自佳節扁舟無一杯曹園舊尊酒戲馬憶高臺
四十三

兵火有餘燼貧村纔數家無人爭晚渡殘月下寒沙
四十四

渚禽菱芡足不向稻梁爭靜宿涼灣月應無失侶聲

唐詩卷五
五
四十五

輕雲未護霜樹杪橘初黃信是知名物微風過水香
四十六

渺渺望天涯清漣浸赤霞難逢星漢使烏鵲日乘查
四十七

土曠深耕少江平遠釣多生平皆棄本金革竟如何
四十八

海月非常物等閑不可尋披沙應有地淺處定無金
四十九

風晚冷颼颼蘆花已白頭舊來無葉寺堪憶玉京秋

五十

風好來無陣雲閑去有宗釣歌無遠近應喜罷朦朧
五十一

吳疆連楚甸楚俗異吳鄉漫把尊中物無人啄蟹匡
五十二

岸綠野煙遠江紅斜照微撐開小漁艇應到月明歸
五十三

雨餘江始漲漾漾見流薪曾歎河中木斯言憶古人
五十四

葉舟維夏口煙野獨行時不見頭陀寺空懷幼婦碑

五十五

晚泊武昌岸津亭踈柳風數株曾手植好事憶陶公

五十六

墜露晚猶濃秋花不易逢涉江雖已晚高樹寒芙蓉

五十七

舟航依浦定星斗滿江寒若比陰霾日何妨夜未闌

五十八

近戍離金落孤岑望火門唯將知命意瀟灑向乾坤

五十九

叢菊生堤上此花長後時有人還采掇何必在春期

六十

夕景殘霞落秋寒細雨晴短纓何用濯舟在月中行

六十一

垠壤滿江水地坳生野塘晚荷人不折留此作秋香

六十二

左宦終何路攄懷亦自寬襏屨嘲白鷺無意喻梟鸞

六十三

樓空人不歸雲自去時衣黃鶴無心下長應笑令威

六十四

白帝朝驚浪尋陽暮映雲等閑生險易世路祗如君

六十五

櫓慢開輕浪帆虛帶白雲客船雖狹小容得庾將軍

六十六

風雨正甘寢雲霓忽晚晴放歌雖自遣一歲又崢嶸

六十七

靜看秋水風微浪漸平人間馳競處塵土自波成

六十八

風借帆方疾風回權却遲較量人世事不校一毫釐

六十九

咫尺愁風雨匡廬不可登祗疑雲霧窟猶有六朝僧

七十

幽思正遲遲沙邊濯弄時自憐非博物猶未識鳧葵

七十一

曾有煙波客能歌西塞山落花唯待月一釣紫菱灣

七十二

千頃水紋細一拳嵐影孤君山寒樹綠曾過洞庭湖

七十三

光濶重湖水低斜遠鴈行未曾無興詠多謝沈東陽

七十四

晚菊繞江壘忽如開古屏莫言時節過白日有餘馨

唐詩卷五
八
七十五

秋寒鷹隼健逐雀下雲空知是江湖濶無心擊塞鴻

七十六

日落長亭晚山門步障青可憐無酒分處處有旗亭

七十七

江草何多思冬青尚滿洲誰能驚鵬鳥作賦爲沙鷗

七十八

遠岸無行樹經霜有伴紅停船搜好句題葉贈江楓

七十九

身世比行舟無風亦暫休敢言終破浪唯願穩乘流

八十

數畝蒼苔石煙濛鶴卵洲定因詞客遇名字始風流

八十一

興閑停桂楫路好過私門不負佳山水還開酒一樽

八十二

幽懷念煙水長恨隔龍沙今日滕王閣分明見落霞

八十三

短楫休敲桂孤根自駐萍自憐非劍氣空向斗牛星

八十四

江流何渺渺懷古獨依依漁父非賢者蘆中但有機

唐詩卷五
九
八十五

高浪如銀屋江風一發時筆端降太白才大語終奇
八十六

細竹漁家路晴暘看結繒喜來邀客坐分與折腰菱
八十七

幸有煙波興寧辭筆硯勞緣情無怨刺却似反離騷
八十八

平湖五百里江水想通波不奈扁舟去其如決計何
八十九

數逢雲斷處去岸映高山身到韋江日應猶未得閑

九十

一灣斜照水三板順風船未敢相邀釣勞生只自憐
九十一

江雨正霏微江村晚渡稀何曾妨釣艇更待得魚歸
九十二

沙上獨行時吟情到楚詞難將垂岸蓼盈把當江蘼
九十三

新野舊樓名尋陽勝賞情照人長一色江月共淒清
九十四

願飲西江水那吟北渚愁莫教留滯跡遠比蔡昭侯

唐詩卷五
十一
九十五

湖口分江水東流獨有情當時好風物誰伴謝宣城

九十六

尋陽江畔菊應似古來秋爲問幽棲客吟時得酒不

九十七

高峰有佳號千尺倚寒風若使鑪煙在猶應爲上公

九十八

萬木已清霜江邊村事忙故溪黃稻熟一夜夢中香

九十九

楚水苦縈回征帆落又開可緣非直路却有好風來

一百

遠謫歲時晏暮江風雨寒仍愁繫舟處驚夢近長灘

萬首唐人絕句卷第五

萬首唐人絕句卷第六

五言一百首

藍溪雜詠十二首

錢起 二十一首

望山臺

望山登春臺目盡趣難極晚景下平阡花際霞峰色

板橋

靜宜樵隱度遠與車馬隔有時行藥來喜遇歸山客

石井

片霞照仙井泉底桃花紅那知幽石下不與武陵通

古藤

引蔓出雲樹垂輪覆巢鶴幽人對酒時苔上閑花落
伺山徑

幾轉到青山數重度流水秦人入雲去知向桃源裏
藥圃

春畦生百藥花葉香初霽好日與光風偏來入叢蕙
石上苔

淨與溪色連幽宜松雨滴誰知古石上不染世人跡
竹間路

暗歸草堂靜半入花源去有時載酒來不與清風遇
東坡

永日興難忘掇芳春坡曲新晴花枝下愛此苔水綠

石蓮花

幽石生芙蓉百花慚美色遠笑越溪女聞芳不可識

潺湲聲

亂石跳素波寒聲來幾處颼颼風引散出空林去

松下雪

雖因朔風至不向瑤臺側唯助苦寒松偏明後凋色

赴章陵酬李卿贈別

一官叨下秩九棘謝知音芳草文園路春愁滿別心

郎真外見尋不遇

軒騎來相訪漁樵悔晚歸更憐誰露跡花裏點墻衣
逢俠者

燕趙悲歌士相逢劇孟家寸心言不盡前路日將斜
過故呂侍御宅

不見承明客愁聞長樂鐘馬卿何早世漢主欲登封
送楊著作歸東海

楊柳出關色東行千里期酒酣暫輕別路遠始相思
九日寄姪

采菊偏相憶傳香寄便風今朝竹林下莫使桂尊空
崔逸人山亭

藥徑深紅蘚山窓滿翠微羨君花下醉胡蝶夢中飛

宿洞口館

野竹通溪冷秋泉入戶鳴亂來人不到寒草上階生

梨花

艷淨如籠月香寒未逐風桃花徒照地終被笑妖紅

感事三首

元稹二十五首

爲國謀羊舌從來不爲身此心長自保終不學張陳
自笑心何劣區區辨所寃伯仁雖到死終不向人言
富貴年皆長風塵舊轉稀白頭方見絕遙爲一露衣
題翰林東閣前小松

簷礙脩鱗亞霜侵簇翠黃唯餘入琴韻終待舜絃張
西還

悠悠洛陽夢鬱鬱灞陵樹落日正西歸逢君又東去
與樂天同葬杓直

元伯來相葬山濤誓撫孤不知他日事兼得似君無
旅眠

內外都無隔帷屏不復張夜眠兼客坐同在火爐牀
合衣寢

良夕背燈坐方成合衣寢酒醉夜未闌幾回顛倒枕
竹簾

竹簾襯重茵未忍都令卷憶昨初來日看君自施展
牡丹二首

簇蘂風頻壞裁紅雨更新眼看吹落地便別一年春
象人

繁綠陰全合衰紅展漸難風光一擡舉猶得暫時看
象人

被色空成象觀空色異真自悲人是假那復假爲人
歲日

一日今年始一年前事空淒涼百年事應與一年同
贈熊士登

平生本多思况復老逢春今日梅花下他鄉值故人

夏陽亭臨望

望遠音書絕臨川意緒長殷勤眼前水千里到河陽

日高睡

隔是身如夢頻來不爲名憐君近南住時得到山行

輞川

世累爲身累閑忙不自由殷勤輞川水何事出山流

天壇婦

爲結區中累因辭洞裏花還來舊城郭煙火萬人家

雨後

倦寢數殘更孤燈暗又明竹梢餘雨重時復拂簾驚

晴日

多病苦虛羸晴明強展眉讀書心緒少閑卧日長時

直臺

康入神羊隊烏驚海鷺眠仍教百餘日迎送直廳前

行宮

寥落古行宮宮花寂寞紅白頭宮女在閑坐說玄宗

醉行

秋風方索漠霜貌足睽携今日騎驄馬街中醉踏泥

指巡胡

遣悶多憑酒公心只仰胡挺身唯直指無意獨欺愚

飲新酒

聞君新酒熟，況值菊花秋。莫怪平生志，圖銷盡日愁。
香毬

順俗唯團轉，居中莫動搖。愛君心不測，猶訝火長燒。
嘉陵水

爾是無心水，東流有恨無我心。無說處也共爾何殊。
漫天嶺贈僧

五上兩漫天，因師懺業緣。漫天無盡日，浮世有窮年。
百牢關

天上無窮路，生期七十間。那堪九年內，五度百牢關。

二月十九日酬王十八全素

君念世上川，嗟予老瘴天。那堪十日內，又長白頭年。
古築城曲五解

年年塞下丁，長作出塞兵。自從冒頓強，官築遮虜城。
築城須努力，城高遮得賊。但恐賊路多有城，遮不得。
丁口傳父口，莫問城堅不平。城被虜圍，漢斲城墻走。
因茲請休和，虜騎往來過。半疑兼半信，築城猶差我。
築城安敢煩，願聽丁一言。請築鴻臚寺，兼愁虜出關。

逢雪宿芙蓉山

劉長卿 三十首

日暮蒼山遠，天寒白屋貧。柴門聞犬吠，風雪夜歸人。

送客之閩中

朝無寒士達家在舊山貧相送天涯裏憐君更遠人
贈秦系二首

群公誰讓位五柳獨知貧惆悵青山路煙霞老此人
初迷武陵路復出孟嘗門回首江南岸青山與舊恩
夜中對雪贈秦系時秦初與謝氏離婚謝
氏在越

月明花滿地君自憶山陰誰遣因風起紛紛亂此心
湘妃

帝子不可見秋風來暮思嬋娟湘江月千載空蛾眉

斑竹

蒼梧千載後斑竹對湘沅欲識湘妃怨枝枝滿淚痕
春草宮懷古

君王不可見芳草舊宮春猶帶羅裙色青青向楚人
正朝覽鏡

憔悴逢新歲芳菲見舊春朝來明鏡裏不忍白頭人
瓜洲送李端公

片帆何處去匹馬獨歸遲惆悵江南北青山欲暮歸
送張十八歸桐廬

歸人乘野艇帶月過江邨正落寒潮水相隨夜到門

過白鶴觀尋岑秀才不遇

不知方外客何事鎖空房應向桃源裏教他喚阮郎

聽彈琴

泠泠七絃上靜聽松風寒古調雖自愛今人多不彈
詠墻陰下葵

此地常無日青青獨在陰太陽偏不及非是未傾心
入百丈澗見桃花晚開

百丈深澗裏過時花欲妍應緣地勢下遂使春風偏
送子壻往揚州四首

渡口發梅花山中動泉脉蕪城春草生君作揚州客

半邏鶯滿樹新年人獨還落花逐流水共到茱萸灣
鴈還空渚在人去落潮翻臨水獨揮手殘陽歸掩門
狎鳥携稚子釣魚終老身殷勤囑歸客莫話桃源人
寄龍山道士

悠悠白雲裏獨住青山客林下晝焚香桂花同寂寂
送方外上人

孤雲將野鶴豈向人間住莫買沃洲山時人已知處
送靈澈

蒼蒼竹林寺杳杳鐘聲晚荷笠帶夕陽青山獨歸遠
茱萸灣

荒涼野店絕迢遞人煙遠蒼蒼古木中多是隋家苑
赴楚州阻淺

楚城今近遠積靄寒塘暮水淺舟且遲淮潮至何處
江中對月

空洲夕煙歛望月秋江裏歷歷沙上人月中孤渡水
平蕃曲三首

吹角報蕃營回軍欲洗兵已教青海外自築漢家城
渺渺戍煙孤茫茫寒草枯隴頭那用閉萬里不防胡
絕漢大軍還平沙獨戍閑空留一片石萬古在燕山
尋賀九不遇

楚水日夜綠傍江春草深青青遙滿目萬里傷歸心
送友人

對酒灞亭暮相看愁自深河邊草已綠此別難爲心
送蕭校書

馬識青山路人隨白浪船別君猶有淚學道漫經年
宿道士觀

堂閉仙人影空壇月露初閑聽道家子盥漱讀靈書
送陳標

滿酌勸童僕好隨郎馬蹄春風戒行李莫上白銅鞮
重陽宴百花亭

閑携九日酒共到百花亭醉裏求詩境回看島嶼青
酬李驥侍郎

此去非關興君行不當遊無因兩處馬共飲一溪流
別李侍御後却寄

已作亭下別未忘燈下情吟多欲就枕更漏轉分明
天長路別朱大 李驥二首

驛騎難隨伴尋山半憶君蒼崖殘月路猶數過溪雲
酬朱大

十夜郡城宿苦吟身未閑那堪西郭別雪路問看山
雨後思湖上居 許渾六首

前山風雨涼歇馬坐坐楊何處芙蓉落南渠秋水香
聞歌

新秋絃管清時轉遏雲聲曲盡不知處月高風滿城
思天台山

赤城雲雪深山客負歸心昨夜西齋宿月明琪樹陰
長安早春懷江南

雲月有歸處故山清洛南如何一花發春夢徧江潭
塞下

夜戰桑乾北秦兵半不歸朝來有鄉信猶自寄征衣
送客南歸

野寺薜蘿晚官渠楊柳春
歸心已無限更送洞庭人

萬首唐人絕句卷第六

萬首唐人絕句卷第七

五言一百首

嵩山夜還

宋之問 六首

家住嵩山下好采舊山薇
自省遊泉石何曾不夜歸
湖上別鑿上人

願與道林近在意逍遙
篇自有靈佳寺何用沃洲禪
題鑿上人房二首

落花雙樹積芳草一庭春
玩之堪興異何必見幽人
晚入應真理經行尚未回
房中無俗物林下有青苔
途中寒食

馬上逢寒食途中屬暮春可憐江浦望不見洛橋人

荅田徵君

出游杳何處遲回伊洛間歸寢忽成夢宛在嵩丘山

詠史

高適 六首

尚有綈袍贈應憐范叔寒不知天下士猶作布衣看

田家春望

出門何所見春色滿平蕪可歎無知己高陽一酒徒

閑居

柳色驚心事春風厭索居方知一杯酒猶勝百家書

送兵至薊北

積雪與天迥屯兵連塞愁誰知此行邁不為覓封侯

封丘作

州縣才難適雲山道欲窮揣摩慚黠吏棲隱謝愚公

題張處士菜園

耕地桑柘間地肥菜常熟為問葵藿資何如廟堂肉

石宮四詠

元結 八首

石宮春雪白白雪宜蒼苔拂雪踐石徑俗士誰能來

石宮夏水寒寒水宜高林遠風吹蘿蔓野客熙清陰

石宮秋氣清清氣宜山谷落葉逐霜風幽人愛松竹

石宮冬日暖暖日宜溫泉晨光靜水霧逸者猶安眠

唐詩卷七
將牛何處去二首

叔閑叟甥
直者長子

將牛何處去耕破故城東
相伴有田父相歡惟牧童
將牛何處去耕破西陽城
叔閑修農具直者伴我耕

將船何處去二首

叔靜叟甥
正者次子

將船何處去釣彼大回中
叔靜能鼓撓正者隨弱翁
將船何處去送客小回南
有時逢惡客還家亦少酣

效何水部二首

韋應物
六十首

玉宇含清露香籠散輕煙
應當結沉抱難從茲夕眠
夕漏起遙怨蟲響亂秋陰
反覆相思字中有故人心
期元侍御不至二首

庭樹忽已暗故人那不來
祇應厭煩暑永日坐霜臺
官榮多所繫閑居亦愆期
高閣猶相望青山欲暮時

灋上醉題

芳園知夕燕西郊已獨還
誰言不同賞俱是醉花間

西郊

山高鳴過雨澗樹落殘花
非關春不待當由期自賒
對月寄孔諫議

思懷在雲闕泊素守中林
出處雖殊跡明月兩知心

贈李儋

風光山郡少來看廣陵春
殘花猶待客莫問意中人

寄釋子良史酒

秋山僧冷病聊寄五三杯應瀉山瓢裏還寄此瓢來
上皇三臺

不寐倦長更披衣出戶行月寒秋竹冷風切夜窓聲
褰子臥病

念子抱沉疾霜露變滁城獨此高窓下自然無世情
寄璨師

林院生夜色西廊上紗燈時憶長松下獨坐一山僧
寄盧陟

柳葉遍寒塘曉霜凝高閣累日此留連別來成寂寞
宿永陽寄璨師

遙知郡齋夜凍雪封松竹時有山僧來懸燈獨自宿
雪行

浙瀝覆寒騎飄颻暗川容行子郡城曉披雲看杉松
秋夜寄丘員外

懷君屬秋夜散步詠涼天山空松子落幽人應未眠
入西齋示僧

僧齋地雖密忘子跡要賒一來非問訊自是看山花
贈丘員外

跡與孤雲遠心將野鶴俱那同石氏子每到府門趨

贈舊識

少年遊太學負氣蔑諸生蹉跎三十載今日海隅行

寄淮上綦母三

請去聲
作音佐

滿城憐傲吏終日賦新詩請報淮陰客春帆浪作期

送房杭州

專城未四十暫謫豈蹉跎風雨吳門夜惻愴別情多

聽江笛送陸侍御

遠聽江上笛臨觴一送君還愁獨宿夜更向郡齋聞

荅賓

斜月纔鑿帷凝霜偏冷枕持情須耿耿故作單牀寢

送丘員外歸山居

郡閣始嘉宴青山憶舊居爲君量革履且願住藍輦

荅崔都水

深夜竹庭雪孤燈案上書不遇無爲化誰復得閑居

酬令狐司錄善福精舍見贈

野寺望山雪空齋對竹林我以養愚地生君道者心

荅趙氏生

暫與雲林別忽陪鴛鴦翔看山不得去知爾獨相望

荅王卿送別

去馬嘶春草歸人立夕陽元知數日別要使兩情傷

懷琅耶二釋子

白雲埋大壑陰崖滴夜泉應居西石室月照山蒼然
話舊

存亡三十載事過悉成空不惜霑衣淚併話一宵中
閭門懷古

獨鳥下高樹遙知吳苑園淒涼千古事日暮倚閭門
登樓

茲樓日登眺流歲暗蹉跎坐厭淮陰守秋山紅樹多
善福寺閣

殘霞照高閣清山出遠林晴明一登望瀟灑此幽襟
寒食後北樓作

園林過新節風花亂高閣遙聞擊鼓聲蹴踘軍中樂
西樓

高閣一長望故園何日歸煙塵擁函谷秋鴈過來稀
夜望

南樓夜已寂暗鳥動林間不見城郭事沉沉唯四山
晚登郡閣

悵然高閣望已掩東城關春風偏送柳夜景欲沉山
詠玉

乾坤有精物至寶無文章雕琢爲世器真性一朝傷

詠露珠

秋行一滴露清夜墜玄天將來玉盤上不定始知圓

詠水精

映物隨顏色含情無表裏持來向明月的樂愁成水

詠珊瑚

絳樹無花葉非石亦非瓊世人何處得蓬萊石上生

詠瑠璃

有色同寒冰無物隔纖塵象筵看不見堪將對玉人

詠琥珀

曾爲老茯神本是寒松液蚊蚋落其中千年猶可覲

詠曉

軍中始吹角城上河初落深沉猶隱帷是朗先分閣

詠夜

明從何處去暗從何處來但覺年年老半是此中催

詠聲

萬物自生聽大空恒寂寥還從靜中起却向靜中消

野居書情

世事日可見身名良蹉跎尚瞻白雲嶺聊作負薪歌

郡齋卧疾

香爐宿火滅蘭燈宵影微秋齋獨卧病誰與覆寒衣

秋齋獨宿

山月皎如燭風霜時動竹夜半鳥驚栖窓間人獨宿

秋夜

高閣漸凝露涼葉稍飄闌憶在南宮直夜長鐘漏稀

詠春雪

徘徊輕雪意似惜艷陽時不悟風花冷翻令梅柳遲

對殘燈

獨照碧窓久欲隨寒燼滅幽人將遽眠解帶翻成結

紫荊花

雜英紛已積含芳獨暮春還如故園樹忽憶故園人

翫螢火

時節變衰草物色近新秋度月影纔斂繞竹光復流

移海榴

葉有苦寒色山中霜霰多雖此蒙陽景移根意若何

題桐葉

參差剪綠綺瀟灑覆瓊柯憶在灃東寺偏書此葉多

池上

郡中卧病久池上一來賒榆柳飄枯葉風雨倒橫杳

西塞山

勢從千里犇直入江中斷嵐橫秋塞雄地束驚流滿

夜聞獨鳥啼

失侶度山覓投林舍北啼今將獨夜意偏知對影栖
聞鴈

故園眇何處歸思方悠哉淮南秋雨夜高齋聞鴈來

竹裏逕

司空文明 十六首

幽逕行跡稀清陰苔色古蕭蕭風欲來乍似蓬山雨

黃子陂

岸芳春色曉水影夕陽微寂寂深煙裏漁舟夜不歸

田鶴

散下渚田中隱見菰蒲裏哀鳴自相應欲作凌風起

藥園

春園芳已遍綠蔓雜紅英獨有深山客時來辨藥名

石井

苔色遍春石桐陰入寒井幽人獨汲時先樂殘陽影

板橋

橫遮野水石前帶荒村道來往見愁人清風柳陰好

石蓮花

今逢石上生本自波中有紅艷秋風裏誰憐衆芳後

遠寺鐘

杳杳踈鐘發月風清復引中宵獨聽之似與東林近

松下雪

不隨晴野盡獨向深松積落照入寒光偏能伴幽寂

新柳

全欺芳蕙晚似妬寒梅疾撩亂發青條春風來幾日

唐昌公主院看花

遺殿空長閉乘鸞自不回至今荒草上寥落舊花開

別張讚

今日山晴後殘蟬菊發時登樓見秋色何處最相思

晚思

蛩餘窓下月草濕堦前露晚景淒我衣秋風入何樹

留盧秦卿

知有前期在難分此夜中無將故人酒不及石尤風

金陵懷古

輦路江楓暗宮朝野草春傷心庾開府老作北朝臣

哭麴山人

憶昔秋風起君曾歎逐臣何言芳草日自作九泉人

下第

趙嘏 四首

南溪抱瓮客失意自懷羞晚路誰携手殘春自白頭
到家

童稚苦相問歸來何太遲共誰爭歲月贏得鬢邊絲

春釀

春釀正風流
梨花莫問愁
馬卿思一醉
不惜鷓鴣裘

寒塘

曉髮梳臨水
寒塘坐見秋
鄉心正無限
一鴈度南樓

前首唐人絕句卷第七



固